

زمن طازة

شعر

د. يسرى العزب

الطبعة الأولى
الكتاب : زمن طازة
المؤلف : د . يسرى العزب
تصنيف الكتاب : شعر
تصميم وإخراج : محمد جمال
المقاس ٢٠ × ١٤
رقم الإيداع : ٢٠١٥ / ١٥١٧٠
الترقيم الدولي : 5 - 080 - 776 - 977 - 978

التجهيزات الفنية والطباعة
دار يسطرون
للطباعة والنشر والتوزيع
طباعة وتوزيع الكتب في جميع أنحاء العالم
المكتبة والمطبعة : ٣ ش صفوت - محطة المطبعة
شارع الملك فيصل - الجيزة
جمهورية مصر العربية
٠١١٥٧٧٦٠٠٥٢ - ٠١٢٢٩٣٠٠٠٢٩
مدير الإنتاج : أحمد عبد الحليم
رئيس مجلس الإدارة : عماد سالم

جميع الحقوق محفوظة

الإهداء

لمن يعرفونى ليزدادوا حبا
ولمن لم يعرفونى ليزدادوا قربا

(ع.ى)

(٢٠١٥/٦ /١٥)

تَهْنِئَةٌ

اخترت مرة المنتصف

بصيت ل فوق

بصيت لتحت

يمين..

.. شمال

شفت الحقيقة وهي جاية..

من بعيد

وواحدة..

واحدة..

بتنكشف

ولقيتني زى الطيف

وباجرى ع الطريق

كل اما أقرب.. باكتشف

الشمس بهدوء.. تنكسف

وباخاف لأطلع سلمة ..

ألاقي عمري ..

غصب عنى ..

وغصب عنه ..

بينخسف

معقول كده؟

معقول أقف ..

ع الباب سنة ..

وف لحظة صعبة ..

بدون مناسبة ..

القانى منى .. بانخطف

.. وف سجن ضيق ..

مرة واحدة ..

أفوق لروحي

بانحدف

فى مسار حرير ..

أخضر.. طرى

ماشى على حد الصراط..

ما اقدرش عنه أنحرف

فرحان بسجنى المفترى

فرحان بغرقى ف..

بحر حبك..

بانجرف

شديت خيولى جريت بها

مديت لها حبلَ السّماح

منحتنى من شهد الرضا

كل الشرف

ارتاح ضميرى..

ورحت فى النوم..

حبتين

صوت الحقيقة فاح بسرّه..

واعترف

وعشان كده..
سلمت للسجن الإيدين..
ولقيتني مُش عارف..
شمالى م اليمين
لقيتني باغرق
وارتجف
الضفدعة تسبقني للشط البعيد
وفضلت ازكّ وأنتظر
تيجى الصدف
تلاتين مؤبد عشتهم.
فوق السنين
أشغال وشاقة وفجاه..
قررت اعترف..
وأنا كنت باكدب فى اعترافى
بسّ فقرى وحاجتى ليك
خلونى اعترف

والذنب كان حبك
وكان... حتماً أكيد..
يوما - مع نفسى - أقف
وقفت ..
فُقتِ..
حسيت بروحى باتخطف
وانت اللى واخدانى لبعيد ..
مشوار جديد ..
وفرحت به.
وكاءننا..
بالسحر.. فى المنفى..
جنين..
ونقطة.. نقطة..
حبة.. حبة..
بنتولد
وبنتسند..

فوق الجروح
سُكر نبات
صوت السّكات ..
بيدوّبه
فيبوح بسّره ..
ويعترف

٢٠١٠/٨/٢٥

نعيم الروح

ساكن فى (نصر الدين)
وانت ف (مدينة نصر)
وكننت رايح طوخ راكب المترو
فجأة التقيتك جنب منى ف (شبرا؟)
الوقت كان رمضان..

وصيف حامى

شايل فى شنطة غرامى
شايل قسايدك فى الوريد
يا ااه لاتحاد دمنا فى الحروف
نكتب كلام صادق نرشه ع الوطن
تبدأ طريقك من (شبين القناطر)
وأبدأ طريقى من ورا (البشمور)
من نقطة (دمشيلت) مسمارها

سبحان مخضّرها!!

- من كان يصدق..

ولادها - بعد عمر طويل -

تصحّرها؟!!

- همّينا بعد الضنى.. وبدأنا مشوارها

- مشيناها فى الصحراء

كأننا ف إسرائ

جبناها شرق وغرب

- كانت عينيك فى السماء

وأنا كنت فى أرضها..

بأتمشى باستحياء

دايما بتسرح فى (الثريا) بعيد

سابق ونعسان سعيد

(الشندغة) تشهد وأنا مرعوب

- عربية هتهد النفق.. فرمل

هديت.. وقمت مشيت

ووصلت للمطلوب
فى الأولى .. شفت (علاء)
فى الثانية .. كانت (سناء)
فى الثالثة كان (البهاء)
فى الرابعة عم (الضياء) دنياك ..
من كافة الأرجاء
فرحت بك فى الخليج ..
وخطفتنى لدنياك
وفرحت بى ف (طحا نوب)
- كل القلوب شهدت لنا ف (قليوب)
- شاعر فصيح عامى
- وعامى فصيح
- الريح يواتى والحسد جراح
يا نص فولتى .. نص فولتك جناح
- سبحانه من خلى الوطن ..
رغم المحن ..

أفراح

- يا ااه ع القلوب لما تحب بجد

تلقى الحلال - لو رخص -

أغلى م الحرام لو زاد

شفنا الحلال فى (البرارى) ..

بيحقق المحال

- واديننا حققناه

- والله حققناه

- والله حققناه

- بس الظروف خليتنا..

ما نصدقش

- شكينا فينا

- قلنا ما بنعرفش

والمعرفة اتلفت على الجاهل

على الحاقد..

على الخطاف

- ناقص قوى وعويل
- لا أب له ولا جد
- ما حد طماع بيستكفى
- خليك فى حالنا يا عم
- مين اللى عم التانى يا (ابن الروح)؟
- مين اللى أكبرنا؟
- مين اللى يضبرع الجروح غيرنا؟
- مين اللى عاش مرهم يدا وينا؟
- مين اللى خلانا نعبر..
- ونبوس تراب (سينا)؟
- نرويهها دم وعرق..
- نحضنها ناس طيبين
- نبدرها نعناع وتين
- يعم فيها النقاء
- والصفاء..
- يصحى الحياء م النوم

- والفن - رغم الجن - يتصلح

- واللى انكسر نصين..

- حتمًا..

وبأيدينا..

هيتصحح

٢٠١٠/٩/١٧

إلى روح صديقى الشاعر الكبير/ عبد المنعم عواد يوسف.

سابع سما

بجد أنا ف سابع سما

شايك في قلبي منعمة..

ومكرمة..

ومعلمة روى الغرام

يا... مُغرمة

حُبِّك سباني.. إنما..

خلاني آخر معلمة..

حبك في قلبي تكلم..

وانت في حضني كأنما..

فرسة أصيلة معلمة

أديك سُكر كلما..

حَسَّيت بي.. بالوما

أديك قوة تشجعك

ونشق جيش الريح..

ونطلع للسما

نركب نجومها والقمر

ونعيش على ريش النعام

فوق الغمام

نتقوى بسلاح الغرام

نضرب في قلب الزيف ..

وقلب الخوف ..

بنكرهم عما

بالحق نرجع للأصول

والدنيا ترقص بالخيول..

تعزف طبول..

نرمح.. ويحلى لنا الحلول..

تختار حبيب..

عارفاه قوى

تديه مفاتيح الدخول

على طول.. ينول
ويعيش يقول
وتقول له بعينيها العسل :
غنى كمان
شد الصباح
شده بعزيمة..
فى الرياح..
ووصل لها..
واداها سكر.. حبته
أكثر.. وأكثر.. كلما..
أكثر لها
وكتب لها فى وصيته...
وصانى إنى أكون كمان
أمسك ميزان الكون بجد
العدل ساد.. والحق شد
والخير طرح فرح الجمال

الحب بالفرح انتشى

وانقام فرح

هو وحبيبته والبلد

بيغنوا فيه وبيرقصوا

- باحبك يا نعمة ربنا

يا عايشة فى قريبة

حُبك زلال..

حبك حلال..

حلال قوى..

حققت أحلام الوصال..

قوى قوى

ووصلنا فى الملكوت قوى

قلت لى إنى كمان أكون..

جامد قوى

وامسك لجام المهرة جد

يطلع بها.. تطلع معاه

ويعشّقوا..

جوة القلوب

سكر يدوب

يا مهرتى

وندوب معاه

يطلع نهار

٢٠١٠/١٠/٢٨

هو مسرح؟

يا ريت - يا حبيبتي - ما يكونش الكلام تمثيل

ويطلع دورك الأتقن

ويطلع دورى انا تهيبيل

يا ريت ياغالية ييجي النيل..

يشوف نيلك..

هيتعلم ..

ويرجع نيل

يا ريت ما يكونش اللي شاددنا

وساندنا

وواخدنا

لآخر الليل

هوَسْ..

تضليل !!

ولا يكونش اللي فى قلوبنا..

ده.. دور تمثيل..

وخذنا عليه

دا مسرحنا..

فضل شغال

سنين عشرين

وجمهوره فى يوم عن يوم

يزيد ويزيد

ويتزاحم فى شباكه..

على المواعيد..

يا ريت ما يكونش..

انا وانت

فى آخر فصل..

فى السهرة

ما زلنا يا روحى فى الأول..

وباقى كثير

يا ريت إحساسنا يتطور..

ويبقى كبير!!

عشان الدنيا تتغير..

نلبسها حرير فى حرير

وتعمر كلها وتطرح

تغنى كلها وتفرح

ويفرح كل عشاقها..

وأشواقنا..

وأشواقها..

تخلي الفرحة فوقنا يطير!

٢٠١٠/١١/١٠

سما بنتى

أحلى نجوم العمر.. أحلاها
ظهرت سها فى طريقى عم النور
شدتنى لسماها..
وياها فوق القمر..
والله وياها

حوالى نور النبى
والمولى يرعاها
واها يا هُووو.. واها
خضرة على الصفيين
وزهور على الخدين
لو يوم رجعت حزين..
سوسو تفرّحنى
وف حضنى ألقاها

أنسى العذاب والضنى
وأتوه فى دنياها
عدت سنينى بها
كبرت حبيبتي سُها
ولقيتني ويا امها
واخواتها، والقمرات
(جودى) و(جنا تامر)
وامى منى أمهم
وعُمُر حمادة مُحَمَّد
(سمر) الحياة (إجلال)
الغالية أم العيال..
والشمس وضحاها
والليلة ليلة (سُها)
(عمرو) الجميل ما احلاه
فرحان وعهد الله
يا ربنا اسعدها

وافرح بأولادها

يا رب ترعاها

٢٠١١/١/٦

فى حفل خطوبة ابنتي سها على د/عمرو حسين

موقعة الجمل

لغاية أمس زى الفل كنا..

كلنا بنحب مصر

كلنا عايزين نغيّر..

توبها الاسود

يبقى أخضر

نهضة طالعة ل فوق تحرّر

تبني مستقبل حقيقى..

مُش مزوّر

ترتفع راية بلادى

ع اللى رايع واللى غادى

يبقى مستقبلها نادى

إيه حصل والشمعة قايده؟

غل مدفون فى سواده

جای مفر فر

الحقونى!! الدنيا مالها

غل شادد حيله جالها

بلطجة تدبج عيالها

راكبة خيل وجمال حميرها

جاية تطفى نور عينينا

حلمنا تدهس

واهى بتدوس علينا

إيه يا دنيا فهميناً؟!

مننا العصابات داهى؟

مننا الخنازير داهى؟

مننا الحمقى.. البهايم؟

لا... يا دنيا!!

مصرنا مش هى دى

مصرنا كانت لنص الليل بهية

مصرنا قامت.. وحالفة تعيش..

أبّية.

مصرنا.. ماهش هفّية

مُش هنمشى

إلا لما الطاغى يمشى

مصرنا العربية شاءت..

لما فاقت

لاجل تمحى الصهيونية

مصر تتغيرّ وترجع..

أم صالحة

أم فلاحه.. وفالحة

أم كل الدنيا.. يا امة

ثورة أولادك هتصحى

ثورة أولادك هتنجح

قومى يا الله

ارفعى رايتك وهمّى

يا بلادى

يا بلادي

دمي نازف من فؤادي..

انهضي بسرعة ولّمي..

لمي دمّك..

لمي دمي

لمي ألمك...

لمي ألمي

واسبقني الدنيا يا أمي

٢٠١١/٢/٢

قنابل وعصا

(١)

يا متنح حسّ وُغورُ

وكفاية تمثل دور

أمك أمريكا قالت لك :

ترحل وتطفى النور

الشمس الحلوة هتزرع..

أراضينا الغالية زهور

لو تفهمم.. تلقى الثورة..

عمّت على كل الدور

هتعمّر مصر الغالية..

لما انت - ف لحظة - تغور

(٢)

ما بتحسشّ..

يا جلد الفيل

بليد حتى النخاع.. خاوى

ومتقرفص على خوفك..

فى كام منديل

ولا بدّ فوق هرم خوفو

ومن خوفك.. ما فيش فايده

وزايده عليك يا ندل النار

بتاكل فيك..

ما بتحسشّ

ولو إنك..

بنفخة تموت

ومش ناوى يا ندل تموت

وبتعاfr.. حلاوة روح

لأنك.. يا غبى.. مجنون

متبّت فيك قراد صهيون

وأنفاسك بنتقطعّ..

ببطء تموت ولا ترجع..

ولا تلجأ لأمریکا

دی باعت كل شیء فيکا

ما فيش فيها مكان ليكا..

فی جلدك قرد أنتيكا

شريط جواك بيتكلم..

كبغل عبيط

وبتقطعّ كلام تخبيط

ولا انت حويط

ولا بتفهم

وليه تفهم؟

باقول لك إيه :

كفيك خان ولا عرفتش

وسابك في الطوفان تغرق

خليلك خان ولا عرفتش
وخلّى عُزلتك قبرك
وهنجى لك..
وهنزيجك..
وهنشيلك..
ومُش راجعين..
ومش هنملّ أونزهق
هنزحف لك..
جيوش حرّة
وهندوسك..
وهنحاكم ماضى تيوسك
ولا واحد.. هيترحم..
عليك مرّة
محاسنك كلها تخريف
ورق خروع..
فى عزّ خريف

وسيف الحق جاى بتار

مافيهش زيف...

ولا هو هزار..

يا غول.. سمسار..

ما بتحسش؟!!

(٣)

ليه تهددنا؟

ليه ترعبنا؟

ليه تعاندنا؟

ليه تعذبنا..

رُدّ.. جاوبنا

قبل ما نشرب دمك..

سبنا

لَمْ كلابك وارحل عنا

- احنا أمل خضر فى وطننا

احنا الشعب اللى انت قهرته

كل بذوره.. واحنا ثمرته

إحنا شبابه..

واحنأ أصحابه..

وانت وُحزبك..

جبتو خرابه

انتو كلابه وُضعت فينا..

وادی وُصحرا

انتو ديابة بتنهش فينا

دلتا وسينا

قاموا ولادنا بأروع ثورة..

واحنأ صحينا

هنوریک ازای الخُصرة..

بتطرح بكرة

(٤)

إن كان عندك حبة دم

ارحل سينا ف حالنا يا عم

هنعمرها.. بجهد شبابها

تحيا بلادی..

ويحيا غضبها

٢٠١١/٢/٣

زمن طازة

من ربي خير م اللي اشترى
واللى صبر خير م اللي هجر
واللى استوى فى النار..

غير ما اتسلق

واللى شرب من دم شعبه

يتحرق

والصبر مفتاح الغرق

- واللى هتف بالحق

- فى وش الطاغوت

- أفضل من اللي..

- حط لسانه فى بئر السكوت

- واللى ماخافش اليوم..

- يعيش دايمًا شجاع

- يرفع صباع..
- يقتل عميل
- وتشد هيبته المستحيل
- يسبق أمام الناس دليل
- يكون قمر وناس
- يحارب الوسواس
- ويحارب الخناس
- يطرد ولاد صهيون
- يطرد ولاد العالمة أمريكا
- ينهى زمن بولوتيكيا
- زمن خراب العقول
- زمن الديول
- زمن الغباء الذكى..
- ... والفوضى خلاقة
- زمن اكتساح النخوة..
- بجراءة

- زمن البراءة اللي ماتت
- والشهامة اللي شاخت
- شباب أراد الحياة
- هيشد عصر الجراءة
- هيرجعه ويزرعه
- زمن الأباء والطهارة
- زمن الصبا والبركة
- زمن الرضا بالقليل
- زمن النبي وصي بسابع جار
- زمن الشرف.. الانتصار
- زمن انهيار إسرائيل
- زمن الزراعة الصح
- زمن الحديد والقمح
- زمن اليمن طاهر
- زمن انتصار الجزائر
- زمن ابن عبد الناصر

- زمن اللي طالع للسّمّا بالحق
- زمن (زقاق المدق)
- زمن نهاية البداية
- يووووه!!!
- من ثورة التصحيح
- زمن الرجوع للخلف
- زمن الزمان بيميل..
- فى الاتجاه الخطأ
- زمن سلام إسرائيل
- زمن حصار العِزّة..
- فى غزة
- زمن احتلال العراق
- زمن الصومال ضاعت
- .. والسودان نصين
- زمن المقاومة اللي..
- بقت إرهاب

- زمن اللي باع النيل..
- ... وباع الغاز..
- ... وباع أمّه
- زمن اللي باع الأرض
- باع العرض
- باع دمه
- زمن اللي (فيرس سين)..
- و(إيدز الصين)..
- دخل عضمه
- زمن تفشى الخراب
- والعيشة تحت التراب
- زمن السّحابة الهباب
- ضيّعت خصوبتها
- سرطنت تربتها
- بوّظت تعليمها وشهاداتها
- زمن الدروس بفلوس

- عطلت كفاءاتها..
- شغلت رشوتها..
- وواسطاتها
- زمن التيوس حكام
- زمن اللي (كله تمام)
- (سعد الصغير) إمام؟!!
- زمن السلام النتن
- زمن الكفن هدمتك
- .. مفرودة فوق جتتك
- ماشى كفن بلا روح
- زمن الجروح والعشش
- زمن الصروح..
- فى (التجمع)..
- و(أرض الجولف)
- ... و(مدينتى)
- زمن الجوانتى ورقص (سوزان)

- زمن الأمان بلطجة

- .. والبلطجة عنوان

- زمن اللئيم العليم

-... والعالم الجاهل

- زمن اللي بالساهل....

بالفهلوة يركب

- زمن اللي قصر قطنها التيلة

- زمن ال جنيه مليم والدولار عيلة

- زمن العيون..

- مانامتش فيه ليلة

- زمن بغيض..

- ... وكريه..

- يا ما صبرنا عليه!!

لكن باقول لك إيه

(الصبر مفتاح الفرج)

٢٠١١/٢/٤

ثورة شعب

- قاعدين فيها ومُش هـنمشى
- إلاً ما هوّ الأول يمشى
- لا بد ليه ما تسيبنا وترحل
- سبنا نعدّل فى اللى جرى لنا
- لا بد زى قراد فى خيولنا
- إحنا خلعنا الناب من روحنا
- واتحدينا الخوف بجروحنا
- ناقص.. ناقص.. ناقص إيه؟
- مُش عايزين إلا التصحيح
- شعب فصيح استحمل جدا
- مسحوب دمه أب وجدًا
- صمّم ينهض ويقيم حدًا
- ورفع راية التغيير سدًا

- يمنع الاستعمار عن أرضه
- يحفظ نيّله ويحفظ عرضه
- يطلع فوق الشمس ينادى
- أم الدنيا هيّ بلادى
- مصر تهادى شبابها بخيرها
- مصر بتشكر من غيرّها
- مصر تعادى اللى يخرّبها
- مصر كرامة ولبست توبها
- حرّيتها من يسلبها..
- تاخذ تارها وروحها قوية
- مصر عفية تصون أمجادها
- قدرت تكسر عين حُسّادها
- والطغيان اللى أفسدها
- باع قلعتها وعرى جسدها
- ثورة شعب عظيم انتصرت
- قامت مصر الثورة ونهضت

- عاشت مصر الحرة وُربّت
- فرضت حكم إرادة الناس
- يحيا الوطن اللي ما ينداس
- يحيا الناس عاليين الراس
- يحيا الشعب

٢٠١١/٢/٣

قرّبت خالص

كل ثانية الحبل بيقرب
وانت مش شايف خطر
مستخبي جوّة بدروم جارك انت
خدّروك ورموك فى نقرة
كنت فى طوارك بتحدف مصر فيها
صوروا لك غير حقيقتك
إنت فرعون القوى..
وحبة مواشى..
فى زريبتك
حاشيتك ذلتنا..
خلتنا..
نذلك
إحنا بنصفي حسابنا..
اللى ما يكفيهش دمك..

يا حرامى
انتظر يا جبان مصيرك
انتظر والحبل قرّب
كل حراسك مضوا واتبرّوا منك
كلهم خلوك فى حفرة..
تموت بعارك
لسه بيقاوموا.. وفاكرينك..
(مبارك)
حتى إسمك فرّ منك
لا شماتة..
رغم إنك..
هلف جاهل
بسّ تستاهل..
وأكثر..
تنتهى فوراً..
عشان الشمس..
تظهر

٢٠١١/٢/٢٥

إنته فين؟

مع الحق وإلا..

مع الأمريكان؟

مع الشعب وإلا..

مع الأفعوان؟

مع الجای وإلا..

مع الماضي خان؟.

هتظهر تبان..

هنديك أمان

مع الشمس.. تطلع

مع الحق.. يرجع

مع الشعب.. تسطع

مع الجای.. تفضل

بطل لا يُهان

٢٠١١/٢/٧

قومة عرابى

أنا الأديب الأدباتى
لمصر حبى وحياتى
طول عمرى أزعق وأهاتى
وآهاتى هزت سمواتى

الأرض قامت بشبابى
صحونى لاجل افتح بابى
للثورة.. قامت يا عرابى
ضد اللى كان سر عذابى

فى شرم شيخك يا خواجه
هربان وساكن تلاجة
بتموت ومُش ناقصك حاجة
والناس غلابة ومحتاجة

نهبتها ويا اصحابك
وخطفتها لاجل كلابك
آخرتها شفت اللي أصابك
(حبيبك العدلی) اهو جابك

واهو خش زنزانة وجيهة
القبر أرحم منيها
معزول كئيب قاعد فيها
وحابييه بيطوفوا عليها

(صفوت شريفك) ضاع بعدك
عايش يعرّس ويساعدك
(والعزمى زكريا) مقاعدك
شايل معاه مفتاح وعدك

مفتاح حديد من شركة (عز)
فى السعّر يرفع لما يهز

طبل عليه.. قل هز يا وز
وعبى كرشك لحمه ورز

(فاتح سرورك) يطبخ لك
قوانين عشان ميتين أهلك
(علاء) يهلب ويقول لك:
دا (جمال) وريثك هيذلك

ويا ما قلنا وما سمعتش
تفتح ودانك.. فى المشمش
تلاتين سنة عمال تهبش
فى لحمنا وتقول فركش

اوعاك تكون فاكر روحك
سايب رصيد يشفى جروحك
مرضك لعين ما يفيد نوحك
هتموت بعارك فى صروحك

ولا شرم شيخك يا خواجه
يحميك فى نار التلاجة
هتموت بعارك.. ولا حاجة
وبلدنا ما هتش محتاجة

٢٠١١ / ٣ / ٢٧

جسد واحد

جرى لك إيه يا نور عيني
يا حبة عيني من جوة
صحيتِ وفقتِ م الكوابيس
ومن طغيان كتم نفسك..
سنين وسنين..
وقفتِ فوق هرم خوفو
ورفرف علمك الخفاق..
قهر خوفه
وخليّ جبهتك عالية
وخليّ ولادك الغالية
نجوم بتنور الدنيا
وشفتِ الشهدا يوم ضحوا بأرواحهم..
فداك انتِ

جرى لك إيه يا نور عيني؟

يا روحى انت؟

غمامة بلطجة وإرهاب

سحابة هم فوق الباب

وجيش أغراب ومتخفى

طالع من تحت أنقاض الهموم برة

وخبّوف شعبك الطيب

وخبّوف أرضك الحرة

وألف غراب..

زعق غلاب

وعطل خطوة الثورة

ووقف رحلة التغيير

وما زلنا.. يا حبة عيني من جوة..

ف ميدان تحرير

بنتجمع..

هنتجمع ونتجمع..

ولا هـنخاف ولا نرجع

عشان نرفع تلال الهم عن بدنك

نزيع الفتنة من بيننا

وننهض.. زى يوم النصر..

جيش تحرير

جسد واحد..

بروح واحدة..

هنتحرك فى وش الخوف

وهنحرك تاريخ الوحدة مستقبل..

بيدفعنا إلى قدام

صليب وهلال

جرس وأدان

وبنصلي لإله واحد

وندعى له بصوت واحد

بطيب جرحنا الواحد

ويحمينا من الحساد

يقويننا..

وينصرنا..

وروح الثورة تدفعنا

وترفعنا..

نجوم علمك

نرفرف فوق هرم خوfo

ويقتل قلبنا خوفه

نطيب جرحنا ونمدّ

وعزم جدودنا فينا يشدّ

وتتحرر إرادتنا..

وأم الدنيا تحميننا

وتفضل فينا روح تغيير

٢٠١١/٥/٢١

خیری شلبي

نجم طالع من ضلام الليل
ينور بالتحدى

فوق ديارى

نجم شایل كل نوری وكل نارى

نجم فلاحين قرارى

نجم عمال الزراعة فى البرارى

نجم شایل بندقية

حبرها م النيل وجارى

حبرها عم الحوارى

حبرها خيل السوارى

سنها الحامى بيحكى..

عن شجاعة شعب..

جوة القلب سكنت..

تنتظر بالصبر..

ساعة بعد ساعة

تنتظر وتشد حيلها

واما تيجى الساعة تضرب

غل فى (وكالة عطية)

سهم يرشق..

جوة قلب الغول يفوت

غلها البركان يزلزل فى الطاغوت

يفرض الحرية لو جاية بموت

تعلى فوق الدنيا راية

تنتفض كل البيوت

وشّ هذا الشعب يلمع بالشهادة

والسّما تبقى المراية..

ينتصر جبروت غلابة..

يعدل التاريخ ويتحدى الديابة

- هل يا مطر السحابة..

يا (وتد) من أعتى غابة
هل يا مغرم صباية
كل هذا اللي انت شايله
حلمك انت؟

قلت خير والله خير -

حلم طير قرر يطير

كنت بتعنى بضمير

وانت واثق يا أمير..

إن ساعة الظلم ثانية..

مهما طالت

وإن ساعة الحق جاية..

لاجل تفضل للنهاية

شمعة بتنور طريقنا

عشتها يوم ما احنا شئنا

قلتها لى:

مصر فاقت

لما شاءت

يومها كانت بسمتك..

بتبل ريقنا

قلت و(السنيرة) على وشك

بتضحك..

(هى دى بسّ البداية)

٢٠١١/٩/٣٠

میت فل وعشرة

میت فل لكل الكل ومیت ناجی ومیت راجی

ومیة هاجی وماتجیش

میة فییش وأفییش

ویعییش ومافییش..

ولا فییش

ولا میة قطر.. ومیة سطر

ومیة قصر

ومیة ملیون میت

میة محسن مؤمن

مخلص مرهص

میت مشتل نرجس

میت أهلا..

میت سهلا..

میت صعباً

مُش سهلا..

للجدعان الخلان

صناع الألمونيا الشجعان

میت المقدام..

الصعلوك الإنسان

میت بشلا اتغرزت..

فی کل لسان

میت صبر نفذ فی میت نبهان

محتل القید فجر برکان

میت زلزال دمر جبل الطوفان

بالحق اتکفت کل الأوثان

میت ولی الشعراوی

حکیم التفسیر الجد..

بلیغ التحریر

النحرير

الواعر فى الحق..

مؤدب وأديب

مفتى الأوليا

الأذكيا

الحرافيش

ميت عمر اتحدت

علت وحدة مصر،

وهيبة مصر،

وراية مصر اترفعت..

فى النور

ميت وومن حضنت

ميت مان

ميت شوبش للعرسال

ميت شمعة وميت شمعة كمان

ميت حورس طيب

میت حورس جان

میت قایم..

میت نایم

میت فاطر..

میت صایم

میت شاعر شاطر

میت ناشر..

میت عنوان

میت طالب..

شارب من بزّامه حنان

میت ریس ومهندس متأسس

متوظف ومؤلف

میت عالم فنان

متحوّش متروّش متدروش

متغرب متعذب متقرب

میت فل وعشرة..

وميت نصر لبكره

وميت غمر الكبرى

وميت صلاح الزين

على أروع إنسان

٢٠١١/٩/١٥

زنقة.. زنقة

هي كانت تمثيلية...

تهريجية

تخريفية

عشنا فيها اربع عقود

مدهوشين م اللي جارى لنا

اسمها اتغير قبلنا

إحنا مين؟

كنا فين من ألف عام؟

كنا مين؟

وبقيننا فين؟

قولوا: مين أنتم؟

- ما نعرفش احنا مين!!

جمهورية جماهيرية..

يعني إيه؟

قل لنا أنت : احنا مين؟

كنا ناس حلوين وقوة

كنا عزوة واحنا إخوة

ليه بقينا مقسومين؟

كل واحد فينا أكثر من تنين!!

كل واحد فينا خايف.. منه فيه

كنتو جردان فى الكرار..

وف حارة حارة

وزنقة زنقة

- لما تيجى الدنيا نجرى

فى الكتاب الاخضر نعووم

بسّ لما نشوفه..

نغرق فى الهدوم

تنجلد جوانا كلمة (لأ) نطايطى

تنفلت إيدك وتهرش تحت باطى

تمشى لابس جلابية

حريمى..

برباط كعب واطى

كلها ألوان غريبة

والا جملين مسخرة قدام زريبة

زى خيمة مبهوأة كانت زكبية

تلقى خيبة تخذعك..

تلزق زيبية

تلقى كداب زفة أحواله عجبية

تلقى حشاش كلمته..

من تحت باطه

وانت بتسقف له وبتعذر مراته

(ليبيا) فيك تصحى..

وتسترجع شموخك

يقهرك خوفك..

يزود لك شروخك

تبقى روحك ..

زنقة ..

زنقة ..

تلتقيك (تُكتك) ضعيف

محتاج له زقة

لما تحتاج حقنة ما تلاقيش (سرنجة)

تلتقيك لا شيء

فى (بنغازى) و(برقة)

بُص شف إيده ..

رماها عليك وسابها

- جحش مستعجل خرابها

- وانت مستحمل ..

وبتعقلّ جموحك

لاجل تخلص منه ..

أو تخلص بروحك

لاجل تخلص منه ..

وتداوى جروحك
لاجل تزرع أرضك الحرة كرامة
لاجل ترجع بالسلامة
أمنا للدنيا (ليبيا)
جنة (الزنتان)..
و(مصراة)..
و(طرابلس)
و(الجبل الأخضر)..
ربيع عربى منور
ويا (ترهونة)..
يا بنت الإيه..
يا (بيضا)
لما (إجدابيا) الخصيبة تنتعش
وتغنى (طبرق)
(سرت) تضحك..
شرهبت بالفرحة روحك

صرت تضحك

- شفت إيده وهي بتكسر سنانك

قسمتك..

لعنة زمانك

- الخرافة القذافية..

مكتوبة لك

- ملك ملوك الشحاتين..

غاوى الأذية

بالجنون وبعين قوية

يحلف انه العقل..

بس كبير شوية

قل (أرسطو) (أفلاطون) (سقراط)

(معوّض)!!

يرعبك بالباطو الأبيض

بالكتاب الاخضر

وبحر ابيض مرحرح

والدجاج بببيض ويفقس

والنسا بتحيض وتفقس

واللى شايف نفسه مخلص..

يبقى مخلص..

للتاغوت واولاده بس

كل مخلص يبقى لص.

واللجان فى الخلق ترفس

واللى كان..

ما كانش واحد والا نص

كان فضيحة كبيرة..

بيولعها برص

بس خطف الدنيا..

لما لحسها لحس

كل شنكان كان وهيزود مصايبه

واللى مش عاجبه..

الشريف يعنى..

هيتنيل ويمشى

يا ادبحة زى الخروف..

قدام قرايبه

يوم (سبعناشر)

شهر فبراير..

وفجأة..

هب شعبه..

شعب (ليبيا) الحرثار

وصار جيش من أسود

شعب ليبيا هب ع الجرز الحقود

غار فى داهية

جوة بلاعة بارود

راح جهنم وانحشر

ويا اليهود

٢٠١٢/٤/٢٦

دراهما

(١)

شفتك وانت ف أول عمرك..

بغل متنح

شفتك وانت بتكتم نفسى

صوتى بيعلى..

وانت متنح

من أولها ودمك بارد

حتى لما بتنوى تريح

ريحتك وحشه

واما بتنوى تشمت فىنا

سبت علينا كلابك تنبح

سبت القهر يغمى عينينا

وانت على عرشك متلقح

كنت تحرك حبل عرايسك

وانت بتضحك..

خلف المسرح

تدهس فينا بغلّ نصحصح

يوم ما صحينا

شفنا سرير فوقه بتتمرجح

رغم العمر الطاعن جدا

رغم المرض الطاعن جدًّا

نايم على ضهرك متلقح

آه لو كنت عملت حسابك

كان ربنا رحمك.. وتريح

لكن عملك الاسود سبقك

حدفك جوة النار متلقح

نار الدنيا أحمى وأقوى

أصعب من آخرتها وأنقح

اتغشينا من أولها...

لما رضينها..

بُحْكَمَك لينا

واما صحينا..

فتحنا عينينا..

فجأة لقينا..

بقرة حزينة..

وبغل متنح..

٢٠١٢//٦/٤

(٢)

محتارين.. بين بين وبين

محتارين بين البينين

نرجع ورا.. ثلاثين ورا

والا ورا.. نرجع سنين؟؟

نمسح تاريخ ثورة بلد صبرت كثير

ع الغلب والجبروت وحرّ الزمهير

كل اما نطلع فوق يوقعنا الغفير

تلاتين غفير.. كبراج ورا...

تلاتين سعير

٢٠١٢/٦/٨

(٣)

لما روح الروح تفارق

تلقى روح الروح مشانق

تبقى مش رايق وقلبك

جوة سحر العشق غارق

ادع ربك.. يوفي وعده..

ينقذك م الموت

يا عاشق

٢٠١٢ /٦ /٩

(٤)

انت اللى قلت : اتغيروا

علشان أغيركم

أفك أسر الوطن حالاً واحرركم

تبقوا قوام قدام

لا عبيد ولا خدام

ولا حد يكسرکم

تبنوا وطن أحرار

فيه خلق زى النار

فى دولة مدنية

يحكمها دستور حق ..

يكرم الإنسان

يدى الضعيف قوته

ويدفعه لأمام

يلقى الفقير هدمته

يرتاح ويستغنى

يتعب وبينى الوطن

يبقى الوطن جنة

تقوى العزيمة بنا..

ونعيش ونتهنى

لا بطالة هتهدنا..

ولا خوف هيعزلنا

الكل شغال..

بأجرة حلال..

لا فضل ولا منة

وبلدنا تطلع فوق

واحنا.. تطلعنا

بالعلم والإبداع

تتغير الأوضاع

واحنا بنتغير

والرب يا شعب عادل

دايما وبيغير

يرزق بقدر العرق

يحمى البشر م العرق

يحمى الزمن م القلق

ولا حد يتكدر

ده.. ربنا معانا

حنان بيرعانا

ويقوي مسعانا..

والأرض تتعمر

٢٠١/٦/٢٣

الفهرس

رقم الصفحة	القصيدة
٥	تميمة
١١	نعيم الروح
١٧	سابع سما
٢٣	هو مسرح؟
٢٧	سها بنتى
٣١	موقعة الجمل
٣٥	قنابل وعى
٤١	زمن طازة
٤٩	ثورة شعب
٥٣	قربت خالص
٥٥	إنت فين
٥٧	قومة عرابى
٦١	جسد واحد
٦٥	خيرى شلبى
٦٩	ميت فل وعشرة
٧٥	زنقة..زنقة
٨٣	دراما



مطبوعات الفجر